



**DISKURSU
SUA EXELÊNSIA SR. KAY RALA XANANA GUSMÃO**

**PRIMEIRU-MINISTRU
REPÚBLIKA DEMOKRÁTIKA TIMÓR-LESTE**

**INAUGURASAUN KOMISAUN NASIONÁL ORGANIZASAUN
NASOENS UNIDAS BA EDUKASAUN, SIÊNSIA NO KULTURA
(UNESCO) IHA TIMÓR-LESTE – APREZENTASAUN KULTURÁL
NO RESEPSAUN**

**Ministériu Negósius Estranjeirus, Díli
23 Abril 2009**

Sua Exelênsia Dr. Atul Khare, Representante Espesiál Sekretáriu-Jerál Nasoens Unidas iha Timór-Leste

Dr. Hubert Gijzen, Diretor Gabinete Rejionál Siênsia UNESCO nian ba Ázia-Pasífiku, iha Jakarta, no representante iha Timór-Leste

Sra. Eloisa Ramirez, Diretora-Adjunta Komisaun Nasional UNESCO nian iha Filipinas

Sua Exelênsia Kirsty Sword Gusmão, Embaixadora Boa Vontade ba Edukasaun no Prezidente Komisaun Nasional UNESCO Timor-Leste nian

Membrus Komisaun Nasional UNESCO Timor-Leste nian

Exelênsias,

Ilustres konvidadus,

Senhoras no Senhores,

Ita hotu sente laran kontente tebes tanba bele organiza Aprezentasaun Kulturál no Resepsaun ida ne'e hodi selebra inauguraun Komisaun Nasional UNESCO nian iha Timór-Leste.

UNESCO nia metas reflete mós metas NASAUN ne'e nian, tanba ne'e mak, ohin, inauguraun Komisaun Nasional UNESCO nian iha Timór-Leste hanesan eventu signifikativu ida ba Paíz ida ne'e nia dezenvolvimentu. Ohin kalan ita sei selebra mós eventu ida ne'e ho atuasoens ne'ebé sei hatudu importânsia eransa kulturál povu ida ne'e nian rasik.

Senhoras no Senhores,

Ha'u iha relasaun pesoál ida ke di'ak tebes ho UNESCO depois-de organizasaun ne'e fó mai ha'u prémiu hanaran UNESCO Felix Houphouet Boigny Peace Prize iha tinan 2003. Onra boot ida mai ha'u tanba bele simu prémiu ida ne'e, nune'e hanesan obrigasaun morál ida, ha'u harí Fundasaun Xanana Gusmão atu kontribui, maski ho buat ne'ebé modestu ka folin laek, ba dezenvolvimentu intelektuál no profisionál feto no labarik timór-oan sira ne'ebé iha méritu noabilidade, tanba sira barak mak la iha apoio rekursus nesesárius atu dezenvolve sira nia potênsia rasik.

UNESCO promove kooperasaun internasional entre nasoens iha mundu tomak kona-ba áreas edukasaun, siênsia, kultura no komunikasaun.

Atu hala'o knaar hanesan ne'e UNESCO promove diálogu ne'ebé bazeia ba valores no dignidade kultura rai idaidak nian. Nia meta derradeira ka finál mak lori páz ba povus tomak iha mundu.

Maski UNESCO nia metas bele dehan ambisiozas, metas hirak ne'e mak oras ne'e mai fahe ba ita hotu iha Timór-Leste hanesan parte husi komunidade internasionál.

Aliserse ida mós ba NASAUN ida ne'e nia progresu mak prosesu diálogo ho baze iha respeitu no dignidade ema idaidak nian. Povu Timór-Leste nia istória inklui luta naruk no lakon buat barak, maibé liuhusi diálogo no respeitu mak ita konsege servisu hamutuk ba futuru ida ke di'ak liu ba povu ida ne'e.

Servisu ba futuru, signifika katak ita sei haka'as-an atu providensia ka fó edukasaun ba ita nia labarik sira no promove eransa kulturál.

Bainhira iha Paris ha'u husu ba Diretor-Jerál UNESCO nian, Koichiro Matsuura, atu asiste ami kona-ba prezervasaun eransa kulturál tanba iha risku atu lakon daudaun ona. Maibé, ha'u simu informasaun katak UNESCO la iha pozisaun atu ajuda proteje eransa kulturál hirak ne'ebé "intangível" ka impalpável, tanba la hanesan ho objetus materiais, ne'ebé sei la iha konvensoens internacionais rumá maka bele fó asistênsia hanesan ne'e ba Fundasaun.

Depois-e halo diskusoens, ha'u konvida Diretor-Jerál ne'e mai vizita Timór-Leste, i nia mai duni iha Julhu 2003, no iha okaziaun ne'ebá haú reforsa fali ha'u nia pedidu i agora ha'u hakarak repete tan fali.

Senhoras no Senhores,

Inaugurasaun Komisaun Nasional UNESCO nian iha Timór-Leste, ne'ebé ohin ita hala'o, hanesan duni eventu importante ida ba paíz ida ne'e.

Komisaun Nasional ne'ebé Timór-Leste harí ne'e sei funsiona hanesan órgaun kooperasaun ida ho UNESCO. Membrus Komisaun reprezenta sosiedade sivil, konfisoens religiozas, Governu no Parlamentu Nasional.

Ita sei estabelese ligasoens entre UNESCO ho Ministérius Governu nian ho responsabilidade iha áreas edukasaun, siênsia no kultura, ho hanoin atu hametin asaun Governu iha áreas hirak ne'e tomak.

Só hanesan ne'e mak ita bele garante komunikasaun ne'ebé abranjente ka luan no efetiva entre órgauns governu nian relasiona ho UNESCO nia knaar – hodi nune'e permite ita servisu hamutuk atu atinje ita hotu nia metas.

Senhoras i Senhores,

Papél importante ida hotu Komisaun Nasionál nian mak oinsá bele promove no foti ás kultura no eransa povu ida ne'e nian.

Kultura buat ida ke fundamental atu fortalese ka hametin unidade ho koezaun nacionál. Tanba ne'e mak tenke salvaguarda no celebra nafatin kultura ida ne'e.

Relaciona ho buat hirak ne'e, ha'u hakarak informa katak ohin Dekano Instituto Músika Austrália nian, Dr. Raffaele Marcelino, hakbesik ha'u hodi propoen projeto ida atu prezerva eransa muzikál no linguística Timór-Leste nian ne'ebé extraordinária. Instituto Músika Austrália nian buka hela atu servisu hamutuk ho Governu Timór-Leste atu estabelese Arkivu Nasionál ba Músika no Sons.

Hatutan tan katak, Parseirus Dezenvolvimentu balun hatudu ona interesse hodi asiste Timór-Leste prezerva no hametin ita nia patrimóniu kultural.

Vontade boot tomak atu tulun ita alkansa objetivu ida ne'e, ne'ebé mai husi – UNESCO, Instituto Músika Austrália no Parseirus Dezenvolvimentu balun – oferese ba Komisaun Nasionál oportunidade ida ke boot tebes, ne'ebé ha'u apela ba Ita Boot sira atu labele lakon oportunidade ne'e hodi ajuda prezerva eransa kulturál ita nia povu nian.

Kalan ida ne'e ita iha oportunidade atu asiste aspetu importante ida husi kultura timór-nian rasik – mak kantares ka hananu no dansas ka tebe-dai no bidu tradisionais.

Kantares ho dansas hirak ne'e importante tebes ba sosiedade timór-nian, ba komunidades tomak nia experiênsia no istória. Iha mós papél sentrál atu expresa ema nia hanoin ho hakarak, influensia prosesu kura no mós selebrasoens hanesan ne'e.

Nu'udár Timór-oan ita tenke sente orgulhu ho expresoens muzikais ita nia povu nian rasik, no mós husi jovens sira.

Hanesan mós ho múzika i dansas ne'ebé sei apresenta kalan ne'e, ha'u hakarak enkoraja Ita Boot sira atu asiste atividades seluktán durante Festivál Kulturál. Eventus hirak ne'e sei hatudu povu ne'e nia eransa kulturál, hodi expresa valores no rikusoin povu ne'e nian rasik.

Hein katak Ita Boot sira sei deskansa no diverte aproveita haré atuasoens culturais hirak ne'e, ne'ebé reflete pátria ida ne'e nia esênsia ho klamar.

Obrigadu barak.